



## Editorial

### Mihing sunglam ah kituak lona

Rom 8:14-25

**T**uni i holim nawp na pen chu, Pathian chate ihi chun dan leh thupiak ah umdi ihi dan hi gen gual lo ahisa ahi. School leh College kai ten School dan leh thupiakte azui theilo chun alekha sim nalam amasawn theilo ahi. Office leh sepna dang dang neitenle dan anei chiat ua zia chu a zui lo ua leh asepa abuai ziang thei sek hi. Zia gual achun, Gingtu hinkhua hile soal tawh kido zing ahia, zia soal na a do zawlo vangchun gilona laka suak leh sal ah tang gual mai in a suangtua thei hi. Zia ngaidan hi tulai ahinle a la chia zing hi. Zotu hi dingin Pathian dawnga pauchap zing mi hi akul hi.

#### 1. Gingtu hinkhua chu do nei hinkhua ahi:

Pathian Nam tel Isrealte'n le khawvel ah lung mawng taka akhawsak na ding un agal teu ala do sek ui. Gingtu khat chun khawvel a um sungin gitlo ado zing angai hi. Gingtu i hi zia kin gitlo ineita puau tina hilo in, thil ihi khial thei takei puau tina le ahi diak puai. Gitlo thil chu hi nu-amlo leu hinle bangtiklai inle gitlona chun ei them a, ei zaw gua in ei do zingsek hi. Zia gual thepna laka bit ding achun gingtu chu aki veng zing ding ahi. Gingtu khat chun gitlo chu ado zaw tei

tei ding ahi. Ziakiak chun gingtu hinkhua hi kidona hinkhua ti ahi. Taksa thil ah kidona-meithal a kikap gual chu ahi puau. Gitlo tawh kido zing ihi zia kun pilvang taka khawsak akul hi.

#### 2. Do ding chichuam chuamte:

Gingtu chun khawvel a um sungin do ding chi chuam chuam anei hi. A do dingte chu zia gual ahin akhen dan thei hi.

i) Eima akipata pawt: Eima akipat pawt do ding tamtak a um hi. Eima mimal ki khualnate, du-amnate, chaponate, gitlo bawl nawpnate, mi huatnate, midem leh

lungthim siatnate hi ei mau a kipat pawt vek ahi. Thatdana leh thumatlonate leh adang dang haw hile eima akipat pawt do ding a um zingsek hi. Kithada taka um nawpna hile ei ma akipat pawt tho sek ahi. Zia du-am na khawvel ahin gingtute chun do ding tamtak i nei zing sek ui ti hiatmil lo aphaí.

**ii) I mihing pite laka pat pawt:**

I suapite leh i lawi leh paite, invengte leh ei dawisakte dawi-sakna leh hepina haw hile Pathian dawilo gual lampi ei chiasaktu ahi châng a um thei sek hi. Zu leh sa ahem, Drugs ahem, akibatpi thildang ei dawisakte dawi sakna do a ngai hi; eima sep gimga hilopi nei theina lampi ei dawi sakna hile do akul hi.

Khanglai ihia i khangualpi dangte nei gual nei nawpna le a um thei sek hi. Ziaziak a chun min midang thil diklo takin a gu zelsek uh ahi; Piting tate lakin le zia gual ma chun midang inn guala inpha nei ahem, mi insungavante nei nawpna ziakin lepgukna, eima sep daw hilo nei guatna a hing dawksekk hi. Zia awchakna diklo tak laka hin gingtu chun do ding anei zing sek hi.

**iii) Khawtang leh gam akipat**

**pawt:**

Khawtang leh gam sawrkal kivaihawm dan a phat tawklo ziakin ei sawisa sektu haw hi gingtute'n i do ding tamtak a um bawkk hi. Khawdanga sawrkal na sem, kile thaw a sepphakna le hidiaklo ama sepna mun sangakhua um tam zawte hi gitlo(social evil) ahi thei hi. Law bep dawi a nasep taktak gawlote hi khawtang hinkhua susetu, gam leh nam leh nam püksiatna lampi ahi. Paisa, thuneina leh hun nek-gukte hi khawtang hinkhua gitlona, gingtute'n ado zing ding chu ahi.

**3. Pathian hatna in zotu ihithei hi:**

Zia ihun gentak uh kidona chi chuamchuamte hi mihing mai in zawtak tak thei chi ahi puai. Eima'n zo theilo le hinle zaw dan a um hi, Pathian panpina in gingtute'n pauchapna ah Pathian ho, Bible sim taimatte leh kochuam programme a pan taimatte, kochuam kikhawm ngai pawimawte hi ahi. Min kochuam a bulbel phatzing ahi chun gitlo tamtak chu azaw ahi maisekk hi. Gingtu'n Pathian hatna amatthei dan phapen chu pauchapna Pathian

pawltam hi ahi.

**Thukhakna:**

Gingtu khat chun khawvel a um sung in do ding tamtak anei hi. Taksa thil in do ding inle do ding anei a, Thagau lam inle do ding tamtak anei bawk hi. Mihing hina ah do zaw lo ding tamtak um ding ahi ziakin eisiamtu Pathian dawng zing kawm ah do akul

hi. Gingtu ihi masang in khawvel ah do ding um maleh, Khrista inei ni kipat hin do ding atam zaw diak hi. Ziaziakchun, malam ikalsuan na zosia Pathian tawh ichia khawm lo ahi chun gitlo gal chu do zaw lo ding ihiu. Gitlo do zaw na dinga thilpha pen leh apawimaw pen chu pauchapna hi ahi.

--o0o--

**CHRISTMAS CHIBAI**

Ei uh a dingin Chanchin kipak um, David khawpi ah Hukdampa ahung piang tai, Lalpa Messiah chu..!  
 Lim leh kipak takah I Lalpa Jesu khrist pianchampha mang chiat dingin Subscriberte zosia ka dawisaknau ka lan hi.  
 Chamna Lalpa ahi gual in la lengua chungin Chamna leh muan-na um ta hen..

-- [ WISH YOU ALL A MERRY CHRISTMAS ] ~ Editorial Board

## BETHLEHEM (VĀITHUM IN)

By: Lemlian Vaiphei,  
Leilon Vaiphei Village

**C**hristmas anai tâk tawh kitawn in simtute zosia, Advance Christmas Chibai.

Beth-lehem kiti hi Pathian lekhabu mun tam takin aki mu ahi. Beth-lhem min umzia chu “Vaithum In” tina ahi. Chuleh Beth-lehem hi David Khawpi tin le a ki hiai. Bible a l mu gual un Zebulun Khawpi tin le aki hia ahi. Zia khawpi hi Christiante din mun thupi tuanthun le a la kigen sek hi. Beth-lehem a ki gen tak leh lung lên, Christmas than-gaina a hung kilang sek hi. Nausen Jesu, a nu Mary leh a pa Joseph, Belam chingte leh mipil mi pathum te le geldaw ahi sek’ui. Zia khawpi Beth-lehem l thagau ua cheng zing hi tunin banggual khawpi ahem? Bang chan ah l Christian hinkhua tawh kizawp ahem ti gelkham tak chu ahi.

Thuthung Lui ah Ruth kipat Beth-lehem thumal kipat thil po-imaw en hitiu. Juda gam (Israel) sung kial (famine) nasatak a tung ah, Elimelek leh a inkuante le nekdi hawl’in Moab gam in aki chawn hial’u ahi. Beth-lehem “Vaithum In” natiang le nekdi aum tapua, Vaithum In a nutsiau chawmkhat zaw in thil lamdang khat a um/tung ta, zia chu Elimalek leh a inkuan ten pathian dang milim a ho pan tau ah, Naomi (kipak zing) chu Marah (Kha) a hung hi tai. Naomi Beth-lehem “Vaithum In” ah a um a khan nek di a tasam pua, kipak

zing sek ahi zia kin, miten “kipâk zing nu” tin a hiau ahi. Beth-lehem “Vaithum In” mitthi twi puma a insung mite tawh nusia ah nek leh chak te, chuleh kipâk leh lung muanna a um diam ti ah Moab gam ah a chiau ah, maleh a gello/ginchaklo gual tak ala hita ahi. Moab gam ah chun a chapa tegel’in gam dang pathian a ho ut zaw tau ahi. Ka leh hagiaina mun zawk a suak tai. Ngaitua hitiu; Zia lei l khualzinna gam ahin, mi bangjat’in kipakna leh minthanna hawl’in l hun mantam sumang nalai ding l hui em? Elimalek, Naomi te inkuan a kipat

zildaw nei gua hitiu. Beth-lehem “Vaithum In” ah nek di a umtaklo ziak in marah(kha/lung genthei) a hita mai ui.

Thuthung Thak ah David Khawpi “Beth-lhem” ah bang a tung em ti en kik hitiu. Luka 2:10 nan, Vansawlchak in a kiang un, “Lau kiu inla, ngai tiam un, mi zosia a ding ah chanchinpha kipak um tak ka hun tut hi”. Beth-lehem “Vaithum In” ah hin, kipaknate lak ah kipakna sangpen leh chungnung pen ahi dan zia Bible chang hin I muthei hi. Mizosia a din, Vansawlchak’in Jesu Christa pian thu a gen masakna pen ahi. Mizosia ti hi Greek pau ah “Pass-lahos” tin aki mu ahi. A kodaw chu “Nam zosia, mimal leh insung mite, thilsiam zosia” tina ahi. Jesu Christa pianni I mat’u hi mizosia, nang leh kei a ding ah chan-vawu I nei thei’ui ti muthei ahi. Chanchinpha(Gospel) in a gendaw nawp chu Pathian hepina kipat kipakna/midang kiang ah kipakna thu gendaw hi ahi. Chuleh, zia Chanchinpha hi Pathian hepina kipatna ahi ti hi I Bible in a gendaw pi pen ahi. Luka 2:11 na “Hukdampa/Hukdamtu” in a kodaw chu Tandawktu/Dinsaktu tina ahi. Khawvel ah

mihiamte thina/setan kul sung/ngawngkaw/suak ah umte leh a puktasate kaitho/kaidawk ah dinsak ding ah hung Jesu Christa chu ahi.

JESU CHRISTA HINA VAITHUM: Jesu Christa Galilee dil gal ah mipi leh a nungjuite kiang in, “Keima hina vaithum chu ka hi” (Johan 6:48-51) Jesu Christan a hun gen daw ziang chu mipi te leh a nungjuite a lungkham’u ahi. Ama hi kua ahem? Tin a buai lak lak mai’u ahi. Jesun, “Van ah kipat hungsuk hinna vaithum chu ka hii” ati ahi. Zia hinna vaithum chu Pathian in nang leh kei nekthei ding ah a la lemguat khat chu ahi. Christa Jesu khale Pathian guatlawk leh thilsiam in; tunin nang le kei ding in mun nuainung pen Beth-lhem/Vaithum In leh mi nuai nung pen (gan ankuang sung) in nang leh kei a din in a hung piang tai. Lopina Lalpa I pia ahi. Bang ziak ah Lal Jesu Beth-lhem ah hung piang ahem? I gitlona zosia ngaidam leh tandawktu nang leh kei hinkhua/taksa hi Jesu Christa pianna “Vaithum In” ahi ti I lunggil’un koi chiat hitiu. Vaithum In hi bangtin I mang nau em? Ti ei le ei kidawng chiat hitiu. Christa

nungjui hukdam chate I hitâk ua leh ei un le I hinkhuau midangte ding ah I pia ngam nau em? Kiphâl tak ah midangte a ding ah kipiak leh thilpha bawl hi gin-tute I kin uh ahi.

Nekdi umna Vaithum In, Jesu pianna mun Beth-lhem ahi gual in, I Insung'ua nekdi aum na em? Chate, Tuten nuam ah nekdi a mu zing nau em? Lunggil takin kingaitua hitiu. Christa pianna mun "Vaithum In" a hi khaklo chun, I Inkuan, I cha leh naute leh insak, inthang in le nekdi mu/um-puan tin, mun dang ah nek hawl ah chia khathei ahiu. Mun dang ah nek hawl hin haksatna leh manthaina lam zuan ala ki hi'ut sek hi. Insung hi pauchapna leh maicham siamna in hisak hitiu.

Khawvel pilna leh kxantonate a sâh tâk ziax in, Gingu hinkhua hi Christa a zung phudet apoimaw hi. I doi le tupte le a jatchuam thei a, zia gual dinmun ah gingu hinkhua chu Beth-lhem Christa pianna mun leh chan-vangpha changtu, Beth-lhem ah nekdi kimuna mun leh Christa pianna mun hisak-theitete chu ahiu. I hinkhua/Insung ah Christa pi-ansak'in, miten I kiang'ua nekdi hina vaithum chu la/nen tin'uh, a

mau le Christa ah hingzing inau. I gingu hinkhuau hi a thupi a, hun sin/nisin ah Christa ah kilat zing a pawimaw hi.

Simtute zosia, lunggiltak ah kisiamthakna nei in Christmas lawk tak ah Lawm dingin, Lalpan malsawm chiat ta hen!

## HIATPITU

**Mar 13:9; Nas 22:20; Tpn 1:9; 2:13.**

**-Rev. Seilunlal Vaiphei**

‘Hiatpitu’ ti chu i thil bawl ahem, i thugen ahem ah thudik sulangtu leh panpitu ahia, vaihawmna lam paukam ahi. Vaihawmna ah thubuai nei ten a pannau chu a dik ngei ti akichian zawkna dingin a hiatpitu anei sek ua, zia chu ‘thuhetute’ ti ahi sek hi.

‘Thuhetu’ ti hi ‘martar’ tina ahi. Zia umzia chu Khristiante’n mang cha in, ginna’n Lal Jesu thawkna leh thina thu gennan a mang sek ui. Khristiante chun Jesu Khrista panpitu Na a sep zia kua chun mat leh vawkte(Mat 10:18; 17:6), nawdawte(Nas 22:20; Tpn 2:13; 17:6), khristiante’n “thuhetu” ti amat dan kawng chuam chuam vak sui hitiu.

Amasa pen a Jesu tisa a hung channa leh khristiante thugin gennan a mang sek ui. Baptistu Johan chun Jesu chu khawvel Hukdam dingin a hung hi ti a hiat sak a(Joh 1:7-8,15,32,34; 3:26; 5:32). Jesu nasepte hile Pa kiang apat ah hung ahi ti a hiatsak a(-Joh 5:36), Thuthunglui thute hile Jesu thu hiatsakna ahi(Joh 5:39), Jesu thawkit nung a khan thu hiatsakna ahi(Joh 15:26), zilsak-

te leh teptena leh thilmak bawl mangcha in thuhiatpitu Na hi sep ahi sek hi.

Thuhetu Na hi tel bikte bawlding himai zianglo in, mi zosia bawl ding ahi(Lk 24:48; Nas 1:8). A thu hiatsak chu Lal Jesu hukdamna nasep a hi. Thugentute, zilsaktute, ginna thu puanzakna te ah mang in hiatpina nasep chu sep ahi. Chutichun, Lal Jesu thuhiatpitu chu thugen leh nasep ah Jesu panpitu, Jesu hukdamna thu puangtu, a thugen zia kua ah vuak leh mat ah suangkul tang leh athina hial tiangle huam ahi. A hinkhua zosia Jesu zui ah, mite kiang ah chanchinpha puangzaktu ahi. A tawp tiang a Jesu dinpi ngamtu ahia, tutiang in khristiante dinna ahi zing hi.

## HIATPITU CHU HEPI NASEP EN-KAWLTU AHI, Eph 3:1-7; 1Peter 4:10

Gingtu chu ahinkhua tungtawn in lungsiatna ah kingga ahi. Zia hi hema leu hinle a chang leh i phatna te i fel nate i dinmunte hi i kichapo saksek ah. I dinmun hi mi dangte lungsiatna ziak bep ah chang i hi dan uh hechian leu hin chu chapona tamtak kipumpel ngei in a.

Jesu Khrista hukdamna Na nasep zosia hi Pathian hepina ziak ahi. Zia tak ahin mihing in pan na a kinei puai. Pathian in a bul apan a, lungsiatna in Jesun a supiting hi. Jesu zal ah hukdamna chu chang ding in mi zosia ko i hui a, zia kona chu hepina ziak ahi(Gal 1:6). Hepina a hina ziak chu Pathian kona hi mihingte phat ziak, fel ziak ahi pua, titna ziak a hina bangma a um puai. Hepitu Pathian in mitinglo leh taklote chu a ko a, phulo dinmun chang ding in a chial zawk ahi.

Zia hi sawlchak Paul in a hechian khawp mai a. A nunlui a vak thil a, ama phatna lam bangma suan ding a neilo zia a kihia. A nu gilpi sung apat ah kawichuam leh hepina ziaka ko ahi ti a kichechian khawp mai hi(Gal 1:15).

Jesu Khrista zal ah hukdamna a chante a vak ngaitua a, Pathian hepina ahi ti a hechian ma ma hi. “Pathian chun hepina ahau dungzui ah ei la hepiziak in; i sukkhialnate’u ziak a thi i hi zing lai un, Khrista tawh ki gual in ei suhing ta’n, hepina ah hukhin i la hitau hi” a ti ahi(Gal 2:45). Hukdamna ahin mihing ginna apawimawi tihile kichian tak in ahiai. Maleh Pathian hepina in mihing a ding lampang a zaw masak zia a mu chian kit hi: “Lungsiatna ziak a ginna ah chun hukhin la hi ngal un; zia chu nangmau ah kipat pawt hilo in Pathian thil thawn piak ahi zawi”(Eph 2:8; Rom 3:24; 2Thes 2:16).

Zia Pathian hepina chu mi zosia in a hiat a, hukdamna a chan theina’n gingtute’n mawpuakna i nei hi. Phulo thil pha mutu i hitheina ding in hepina nasepna i chang uh ahi. Paul in le, Lal nasepna “Pathian thuguk chu ka kiang ah hiatsak a um” ti ahia(Eph 3:28). Peter in gingtute chu “Mitin in thilpiak la chandungzui chiat un, Pathian hepina zosia vawp phate gual in, ziate a chun Na kispak chiat un” tin ala gen hi(1Peter 4:10).

Gingtu zosia Lal nasep



ding ah ko i hiu ah, Lal gam nasepna bang ahem ding a ko bik i um hi. I thiamna leh theina ziak ahi pua, Pathian hepina ziak ah ko i hi zawi. Lal nasepna ah hina leh dinmun i chante chu kisuanna ding leh chapona ding a um puai. Semtu chu ahi na dik tak chu suak, a pu sawlna zosia ah chia, sep ding bawl ding ati zosia sem leh bawl ah um, a pu daw dan leh sawl dan zelin nasemtu pha leh phalo ahi sek hi. Pathian hepina ziak in gingtu zosia Lalgam nasepna thei ei pia. Zia Na lopi tak i etkawl na ahin enkawltu pha ihi theina ding in kipiaknate, kingaitawmnate, thumatnate, mamaw zel ding i hiu.

**THUHIATPITU HI CHU KHRISTIAN ZOSIA MAWPUAKNA AHI Luk 24:48; Nas 1:8**

Thuhiatpitu hi Pastorte, Upate leh Evangeliste ahem khut ah um ziang ahi pua, Khristian zosia mawpuakna ahi. Jesu Khrista van ah a kal ding a khan a nungzui sawm leh pakhatte leh mikhenkhatte kiang in a kilak a. A kiang ua thu gen in zia thil zosia hiatpitute la hiu atia. Zilsakte bep hilo in a kiang ah umzosi-ate chu le thuhiatpitu a hi'u hi.

“Kawlkil tiang ah thuhiatpitu” hi ding in aguat ngal a(Lk 24:33,34; Nas 1:8). Penticost ni ah Thagau Thiangtho a hung tun apat khan gingtute chun thuhiatpituna chu a sem pan ua. Chanchinpha a tuna taphawt ah ziana chu gingtute'n la sawn leh sunzawm zel in, tuni tiang ah khristian zosiate mawpuakna ahi zel ta ahi.

Thuhiatpitu hi ding in thiamnate, thil hitheinate chu thil phachuam tak ahi daw thei hi. Thilpiak phataka dawngtute vang chu thuhiatpitu mattak tak ahi sek hi. A ma vang chu Jesu thuhiatsakna chu mitinin thei tawk a nei chiat a kuama semlo ding ah awl a um theilo ahi. Khristian hinkhua pumpi hi Jesu panpina ahem phatsanna ahem ahia. Nasep thil bawl, thugen leh nunchan tiang in nisin thuhiatpitu ginum ahi leh hilo alat sak sek hi. Bangzat ahem a bawl ti sang in a phak tawk ah bang gual a nasa in ahem a bawl ti hi a pawimaw zawi.

Lal Jesu lam ah pang i hiu ti chu i umna zosiau ah latsak ding ahi. I hinate khawlai ahte, lawite lak ah leh i nasepna munate, latsak sek ding ahi. Jesu zilsakna tawh kituak lo leh ama mit-

en i bawl ding ah kilawmlo thilte i maitua hun sin leh thuiatpitu i hi na suklat ngam angai sek hi.

“Kawlkil tiang ah kathu hiatpitu hinlau” ti Jesun agen a khan Khristian zosia huap ahi. Ka chanchin leh ka thute hi puang zak in la tiu un. Khawvel mite kiang ah Pathian chapa kahina leh nangmau hukdamtu ka hi ti hi

gen zel unla, keima ei panpi in haksatna leh lau um banggual le maitua ding la hiu. Mite lak ah ka thu leh zilsakna panpitu hizel ding un, ti in i leng un mawpuakna Na ei pia ahi. Tulai hin Jesu panpitu, khawvel mitmu a thuiatpitu hi ngam a pawimaw hi.

--o0o--

## **LENG HEZEKIAH LEH GINGTU HINKHUA** **(Isai, 36-38)**

**By Neilalkim.**

**L**eng Hezekiah a lal kum sawm leh nga tin kum chun, Judah gam ah khawpi kul ah ki-um zosia bulu ding in Assuria lengpa Senakherib chu ahung kuan ah, a la zo ngal ziang ta'n; Jerusalem do ding in Rabshakeh leh a sepai tamtak te a sawl dawk ta'n, Leng Hezekiah chun Rabshakeh tawh ki ho ding in Eliakim, Shebna tawh Joah chu a sawl tai.

Assuria lengpa'n sim maw tak leh ama khut apat hukdok thei leng leh pathian umlo ahi dan te a la gen ta'n, zia chu Leng Hezekiah in ala hiat phat in, a puan te bawthek in saidipuan sil in Lalpa in ah chun ava lut ah lungthim ah thasia tak in Assuria lengpa'n Pathian hing hosisa ahi dan te gen in a pauchap

tai.

Pathian in a pauchapna chu ngai thak piak in, a suak Zawlnei Isai chu sawl in Assuria lengpa vauna leh demsiatna te chu lau lo ding leh Pathian in Jerusalem chu Assuria te khut ah pia lo ding ahi thu ava hil tai.

Pathian in a gen gual ngei in a bawl ta'n, Assuria te

chu Pathian vansawlchak te'n a vado ziak un lau in a gam lam un a zam tau a, a lengpa'u chu a pathian uh Nisrokh a holai in ama chate mama'n a vathat tau ahi. Zia hun lai ah chun Leng Hezekiah chu thivang in damlo in cum a, Amos chapa Jawnei Isai chun a kiang in Ziagual hin ava gen hi. "La insung sutup in thi ding la hi ta ngalin, damdok talo ding la hi" ava ti'n; Zia phat ah chun Hezekiah chu thase tak in bang lam nga'n Pathian kiang in a pauchap ta, nidang ah Ama mit-mu ah thilpha a la bawl dan te, Ama â ding ah a ginum dante gen in ha ka in a kap tai.

Zia phat chun Lalpa'n Isai chu sawl kit in Lapa David Pathian chun ziagual hin a gen hi va-ti'n atia, "La pauchapna ka la he ta'n, la mitthi tui te le ka la mu tai; la damsung kum 15 hun belap piak ding ka hi" ti'n a vagen a, Dam ngei di a hi ti hiatna ding inle teptena a pia ahi. Hezekiah chu Pathian in a gengual ngei in a damdawk tai.

Zia hunlai ah chun Babulon lengpa chapa Balada chapa Merodokh-baladan chun, Hezekiah damlo thu leh damkit thu te a la hiat ziak in a kiang ah thil-

piak tamtak tawh palai a sawl ta'n, Zia chu Hezekiah chun kipak tak ah a la lamtua in a nei gothil kawina zosia chu a la etsak tai. Zia thu ziak ah chun Zawnei Isai chun "La lal in ah um zosia la pu leh pate'n a la khawlkhawm uh tuni tiang ah umte hi, a leng ah Babulon gam lam ah puak man-na ding ni chu hung tung ngei ding ahi; bangma cha khel hilo ding ahi. La chate khenkhat le puimang in um intin uh, a til uh get in Babulon lengpa na sem inau a va ti ta ahi.

Tulai ah gingtute hile Hezekiah gual ahin, i melma ei sang ah hat te'n a hun vau ua ei hung nawchep phat ua leh kingaitawm tak ah Pathian kiang ah kipelut in a panpina dawn leu hin ei panpi ngei ding ahi. Pathian chu a mite panpi ding ah mansa um zing ahi ti hiatzing di ahi.

Hezekiah chu Pathian hukdawna ziak ah thamuang tak ah aum zing lai in, a taksa damlona a tuak ah thi pi ding khawp ah anat gual ahin, Gingtute le Pathian in a chapa Jesu Krista mang in ei hukdawk malehle natna te I tuak thei ahi (I Kor 3:21, 22na i mu gual ngei in). Zia hun ah chunle Hezekiah gual in Path-

ian in damna anei hi ti hiatmil lo ding ahi. Hezekiah chu Pathian in a dawtna chu ngaithak piak in a sudam in, a dam kum chu kum 15 belap in aum tai. Zia a damna chu a ki thang- pi tak luat zia in, ahun tiang he ta lo in a melmate a ding ah hun lemchang a la si-ampiakna lampi ahi zawta ahi.

Ziagual ahin gingtute le, Pathian ei hepina leh malsawmna i dawtna te zia ah thil vâl talua i bawl ahem, i thil chante, i nasep-nate hi val deu ah kisukminthan-na ahem, mi mitmu ah hawi ding mai ahem, mi mulo di khak lau gual ah thil neu cha i hi te le mi

mu le hiat tei tei ding ah ki tak lat ti te hi, dân leh melma â ding ah panlakna hawitak a hi'khâk di a lau um ahi. Ziaziakchun, pilvang hitiu; Hezekiah in Babulon te hi a melma ding a hila ahiatlo gual in ei unle i melma hi bang gual ah hung ding ahem ti i hethei paw ngal ua.

Lal Jesu ngei inle a thil hi zosia te kha genzâk lo di ati le aum sak in, gendaw di ati le aum sak ahi. Gen ding chi le a umna chung in genlo di le aum kit ahi. Ziaziak ahin gingtute pilvang tak in khosa chiat hitiu.

--o0o--

# TUITHAPHAI PRESBYTERY ICI PLATINUM JUBILEE NA KSP PUITU MASA KHENKHAT TE MIN AH MEMENTO LÂKNA.

**-Rev. S. Ginzalam, Rengkai**

**D**ate 11<sup>th</sup> – 13<sup>th</sup> November, 2022 sungin Saikot ICI Biakln ah, ‘75<sup>th</sup> ANNUAL CONFERENCE-Cum-PLATINUM JUBILEE’ Tuithaphai Presbytery ICI in amat nau a chun, Presbytery puitu masapen ah ala pang kha KSP puitu masate MEMENTO piakdawna a nei ui.

Tuithaphai Presbytery Secretary masapen, Evan Tongneisiak (Mualngat) thasângin a chapa, Rev. S Ginzalam Vaiphei in Jubilee dâk khetna neiin Memento lâkna a nei hi.

Tuithaphai Presbytery ICI Standing Committee member te masapen laka pang Pastor Khaivung (Kangvai) thasângin a tunu Mrs Rebek (Kangvai) in Jubilee dâk khetna neiin Memento lâkna le a nei hi.

Tuithaphai Presbytery ICI Standing Committee member masa te laka pang, Upa Genzapau (Kangvai) thasângin a chapa, Upa Pautinlam (Kangvai) in Jubilee dâk khetna neiin Memento lâkna le a nei hi.

Tuithaphai Presbytery ICI ah Asst. Superintendent masapen (Presbytery Chairman le hi), Pu Siakzalam (Saipum) thasângin a

chanu, Pi Kimlianting (Saipum) in Memento lâkna a nei hi.

Tuithaphai Presbytery ICI ah Presbytery Chairman masa leh Bible School Principal ala hi, Rev. Liankhopau thasângin a chapa, Upa Benjamin (Gouchinkhup) in Memento lâkna a nei hi.

Manipur thingtâng mite lakah Christianna a hung lût dân hi Manipur North leh South in a khen thei hi.

Manipur North District lam a chun Missionary masa, W Pettigrew chu 6<sup>th</sup> February, 1894 in Imphal ah hung lût in, Tangkhul Naga leh Thadou-Kuki te lakin na a sêm hi.

Manipur South District lam a dingin, Watkin R Robert chu 5<sup>th</sup> February, 1910 ni’n Senvawn khu’a’n, thingtâng mite lakah Christian masapen te Pu

Thangkai Vaiphei leh Pu Lungpau Vaiphei te mapuina in a hung lût hi. Amau apat in Christian a hung um pat tak ziakin Mission min dingin Thadou-Kuki pioneer Mission a hung kiti tau hi. A hung pungzel ua, Manipur pawlam, Tripura, Bangladesh(Chittagong Hill) Maru Area, Bawm Area, Saichal Area leh Burma tianga Mission a um tak ziakin Manipur pawlam a te a dingin, Indo Burma Pioneer Mission (IBPM) aki ti un. Manipur sunga dingin Thadou-Kuki Pioneer Mission chu kum 1924 khan North East India General Mission (NEIGM) aki ti tau.

Kum 1929 in NEIGM gamah Watkin R. Robert nasepna entha dingin Sap gama pat HH Coleman chu Manipur in a hung hi. H.H. Coleman sapgama tun kik phatin Watkin R. Robert nasepna chu a phalo lamah a hêk ziakin, sap gama te chun Watkin R. Robert thasângin H.H. Coleman ma a hun sâwl tau. Manipur a hung tun kik phatin Watkin R. Robert Mission NEIGM chu a chu piak a, nam dang te hâwn H.H. Coleman lam a bêl un, Pu Thangkai leh Pu Lungpau ten le a zui ui. Watkin R. Robert lam a chu unau Hmar te leh Vaiphei lamah puitu masa khenkhat te'n bêl in, kum 1930 in Independent

Church a ki ti tau.

Kum 1937 in Dr Crozier leh Rev. VS Liankhopau chu ahung ki melhiat pan tau in, Jorhat ah Din Widdin Memorial Bible College ah zilin 1940-43 sunga um hi. Rev VS Liankhopau Bible College ah Bible zilzo chu kum 1946 in Independent Church a dingin R. Dalla Memorial Bible School, Senvawn khua Principal in a hung pang tai. Zia Mission chu Independent Church of India ti a hung hi tai.

Zia hunlai a chun Kailam Chung-Kailam nuai Presbytery khata um a hi. Kum 1944 ah Presbytery a nei nau a chun Pu Siakzalam chu Kailam chungah Asst. Superintendent dingin a guat ui. Kum 1947 ah Rengкаи ah Presbytery session a nei nau a chun Kailam chung leh Kailam nuai a hun khen tau. Zia Kailam chung Presbytery chu Saikawt Presbytery ti'n a ki hiai. Saikawt Presbytery a hin Pu Siakzalam chu Asst. Superintendent a hi'n, Pastor chu Pastor Khaivung a hi. Tuhin chu Tuithaphai Presbytery tiin a ki he tai.

Kum 1948-1949 sungah Tuithaphai Presbytery ICI khâwmpi masapen ah Chairman S. Rala; Secretary masapen chu Tongneisiak (Mualngat); Com-

mittee members masa te lakah chun Upa Genzapau (Kangvai), Pastor Khaivung (Kangvai) le a pang hi.

Kum 1950-1953 sunga Chairman S. Rala hiin, Secretary chu Tongneisiak (Mualngat) a hi. Member te lakin Upa Paukai (Saipum), Upa Genzapau (Kangvai) leh Upa Kaitinkham te a pang ui. Kum 1954-1956 ah Chairman chu Pu Siakzalam (Saipum) hiin, Secretary chu S. Rala a hi. Committee member te lakin Upa Lallianzui (Lingsiphai) leh Upa Genzapau (Kangvai) a pang ui.

Kum 1957-1959 ah Chairman chu Rev. VS Liankhopau (Kangvai) a hi'n, Secretary chu V. Thanga a hi. Member lakin Upa Genzapau (Kangvai), Upa Neihau (S. Kotlian) a pang ui. Zia hun a Teacher nasêm te laka chun Pu Sawikhosiak le a pang hi. Manipur South District ah Thingtâng mi Christiante laka Khrismas ki mat masakpen na chu kum 1913 ah Senvawn khua a hi.

Rev. Rochung Pudaite Bible zilzo, Mission ah a hunglût phatin Watkin R. Robert chun Mission sung mawpuakna chu a khutin a hun kawiiin, a hun ngansia tai. Rev. Rochung Pudaite in le

Mission sung hun pei lamdangin, Vaiphei lamah puitute dinmun a hun heilam dan chu Vaphei lam te beidawn manin, kum 1957 ah Watkin R. Robert, Churachandpur ah hung chu Kangvai Bazar ah 'GO BACK' a la bawl ziakin Tuithaphai Presbytery ICI ah Vaiphei lam sia chu pawtin Presbyterian Church a zâwm un, tu'n Khuga Sadar Presbytery (KSP) hi a hi tai.

Pu leh pa te'n Pathian na a la sepna ga'u, tu khangthak te'n a luak zel tau. Lalpa Pathian chu pâkin um ta hen.

Pathian thu I gam ua a hung lût dan I suiin, Vaiphei te hi Pathian malsâwmna chang, Thiampu chi deu in ei kawii a. Bangkim ah amasa pawl chu I hi zel ui. Independent Church of India ngei hi le a bul phuttu chu Vaiphei lam te I hi un, NEIGM ah le Khristian masa chu Vaiphei te I hui. Pathian in ei la tel dan te hethiam in, Lalpa a di'n kipe thak zel hi tiu.

--o0o--

**Nausen Jesu chungu**

**AKSI SUTHIAMTE LUNGPOT**

~Rev. Paokhosei kipgen

— “Zia chun a gobawm teu ahawng chiat tau in..”

-Mt.2:1-11cf. Genesis 1:27.

**Thumapui:** Bang dinga kumsin leh Jesu Khrista hi piang ahem ?  
Bang dinga kumsin ah christmas kimang a hem ?

Ningcum'a le pianga, tukum'a le piang kit a hem tihi mi bang hem zat in abuaipi maithei ahi. Kimkhat te chun Bible a mat dinga thupiak kimulou, kumsin ah Christmas hi kimang hem? ti a demloi le um ding ahi.

Jesu Khrista pianni hi kumsin in kimanglo hileh tu sanga tawm zaw'n Jesu helo ding ahiu. Tu sanga tawmzaw'n hukhingna chang ding ahiu in, zia chu Pathian lunglam ahipuai, aziak chu mi zosia, chitin namtin phungtin in lungthim kisikna anei theina dinga Bethlehem Bawng In a hung pianga, namtin kenga tun theina, Eden thak chu avak kit theina ding ahi. Mizosia'n kisikna anei a, pianthakna ineitheina dingua, Sualam mipilten eihung sutho ui. Pathian chu pakin um hen !.

***Hal in tho un, Eden khua avak tai, itup gam chu zuan ngen hitiu.***

Tuanthu khat'a (tradition) aki genna achun sualam mipilte hi mi pali ahiu. Gamchuam chiat apat ah hung kuan, munkhat'a

kisutua ahiu ti'n gen a hi.

Nausen chibai buk dinga ahungnau lampi'a chun khatpa hin Lalpa Jesu pian ding chu ahung taksang zo tapua. Oh ! Zia aksi khu angai a suak, angai a vak ahi ti'n taksang zo talo in akinungle kit tai. Ahin aksi sui-mi (Astrologer) mi pathum te-Melchoir, Casper leh Belthazer vang chu nausen chibai buk dingin amun atun masia'u aksi nung chu azui pek tau ahi.

**Melchoir:**

Melchoir hi Africa gama pat ah hung ahia, ama hin Christa hi Judate lengpa, lengte leng, Pathian te Pathian ahung hiding hi, Pathian apat ah pilna a hung piang nausen chu “Sana” ala piak ahi. Aziak chu hunlai ah lengte chu sana ala kipesek ahi.



**Casper:**

Casper hin “Bego” (frank-incense/incense) hi nausen kipakpina in a pia’i. Ama hi India a kipat a hung hi dinga ginchak a hi. Aziak chu gim namtui hi India sunga akiha mat sek hi. (Ex.30:1; 40:5; Ps 141:1; Heb.9:4; Rev. 5:8;8:4).

Ahin amau hi khawilam mi ahiu em? Ti hi a thupi pua, A nasep uh leh a thil bawl uhi thupi zaw ahi. Christa hi thiampu lakah thiampu chungnung ahung hi ding hi a etsakna’a kipia ahi, ti’n gen hi. Jesu Christa thiampu ah ahungpan hi midang thiampu ngaitalo a, ama hi thiampu tawpna ahi tai.

**Belthazer:**

Belthazer hin “Murra” (Myrrh) hi Christa pian kipakpina in ala pia’i. Ama hi Arab Africa gamsunga kipat hung hi dinga ginchat ahi. Aziak chu Murra hi amau gam a thingdua-thingphung akipat hung kisiamdawk (spice of plants) thingthau namtui chikhat chu ahi. (Genesis 37:25) Christa hi ama leh ama kiphah thiang tak’a mi gitlote a dingah a hinkhua apiakdaw ding hi etsakna ala piak ahi akiti. (Ref.Isaiah 6:6).

**Murra hi akha ahiziakin,**

zia hin a etsak chu Lalpa Jesu christa hi gentheina leh mihiamte dinga lunggimpina ala dimset a hi. Chuleh Murra hi mithi taksa a muat ziang theilo na dinga a kiang vela kikawi sek ahi. Zia ti guala chun sualam mipilte hin kinglyniam takin a gobawm teu asua dawk ua, nausen chibai (worship) abuk ui.

Sualam mipilte hi akile kit phat’un, khatpa hin aloipa kianga chun- nausen chu kei ei pua(gualgual) ahi ahung tia; a loipa chun le zia guala chu ala gel zing dan ahi tuaka, ama’n le kei ei pua(gualgual) zawk ahi ahung ti kit a, chutichun akinial khawlaw tau a hi. Zia phat ah chun a pathumna pa hi ahung kihedawk ta’n, aloiteni kianga chun “Loite haw kinial nial ki’u in, kuama a kipuapi la um puau, kei bep tawh kipua ka hiu”, ahung ti kit tai.

Zia hin a etsak chu Pathian in mihiam hi thilsiam dangdang sanga chungnungzaw dinga a siam ahi, tih kichian takin akimu’i, ama lim kibatpi/kipuapi ah siam ahi ti chetna a hi. (Genesis 1:27) Pathian chu chawihoi in um taken ! Halleluiah..

# Kochuam Sunga um Pawimawna

## Eph. 3:20-21

**T**humapui: Kochuam masa hunlai ah puitu lopitak Cyprian chun, “Kochuam pawlam ah hukdamna a um puai” ti hial in kochuam ah um pawimaw zia a gen hi. Zia gual tak chun kochuam hina hi l pawm thiam paw nau chu! Kochuam sunga umlo gingtu chu gingtu piting hi thei puanna ti vang l gingcha’u. A nuai ahin kochuam sunga um pawimawna tamlo cha ala enkhawm hitiu.

### 1. Thugin in Kochuam sunga um dingin ei hil hi:

l Kochuam Thugin IX ah chun Gingtu zosiate hi ngei ngei ding 11 imu, ziate laka amasapen chu “Kochuam ah kipawlkhawm dinga kizawm-khawm” ti ahia; zia khel a chun ‘Pathian ho dinga kikhawmte, a thuhil gun tak a ngaithak’ ti haw le a kimui. Thugin hin gingtute umna dingchu Kochuam ahi ti ei hilchian kei hi. Gingtu, khristian kiti ngal, kochuam ah l umlo ua chun l ‘hi di’(duty) l supiting pua’u tina ahi. Thugin hin a nawp ziak ahem, a lim um ziak ahem ah kochuam ah pang dingin ei ti pua, gingtu, khrista taksa bak l hi zawk ziak un a taksa kochuam in l pang ngei ding ahi.

### 2. Kochuam chu Thugin dik vawpbittu ahi:

Kochuam chun Bible zil-

sakna dik leh fel chu kingakna mang in thugin a siam a, a vaw-pbit hi. Paukam dang in gen lehin, Kochuam chun gingtute ginna lam ah bittak ah a chia theina ding un thugin pawm gual di leh zawp gual di a siama, zia chu zui ah chia chu bit ah, a lawk a, ato din a det hi. Mimal tuina leh phulna bep zui a, thugin ngaisan-glote thagau hinna leh nasepna chun Bible thu a kal pai a, ato zo sek lo ahi. Ziaziakchun, gingtute a din kochuam sunga um hi a pawimaw mama hi.

### 3. Kochuam chu Pathian thudik manga gingtute kichawpna mun ahi:

Bible zilsakna laigil pat ah thugin tawh kituak ah a chia ziak in Lal nasepna hi a bitsek. Pathian thu diktak ah hilna mun, Lalpa Sacrament diktak ah guanggalna mun leh ama Pathi-

an ngei le a kipuanna ahi ziakin, kochuam ah Pathian thu kichaw-pna hi a lul ahi. Thagau lam leh taksa lam ah mihat leh hatloten a tangpi ah l pawimaw'u l dawnna mun uh ahi. Ziate ziak hin Cyprian chun, 'Kochuam hi nu a la nei theilo chun Pathian hi Pa gual in ko thei ngai puan la' ati ahi. John Calvin inle Kochuam hi ei paitu leh chawmtu pitingtu nu gual in agen, 'zia nu ngai umtak hin a gilpi ei vawp a, a nawitui in ei chawm a, a etkawlna leh venbitna nuai ah ei kawilo chun hindaw thei ahi puai' ti hial in agen hi. Zia hin kochuam sunga um a pawimaw dan ei hilchian mama hi.

#### **4. Kochuam chun zilsakna diklo leh bitlo lak in ei hum:**

Kochuam mun ahi ziakin zilsakna diklo leh bitlote laka ei humbittu ahi. Mitin hin eima thagau hinna a Pathian hiatdan leh athu lak dan l nei chiat ua, zia chu kochuam in Pathian thu a chiapi dan leh a zilsaknate manga, kaihuae leh siam lem akul zing sek hi. Zia chu ngai dau a, eima dawigual leh l tuipi Pathian thu chia chuampina chun zilsakna bitlo a ei pui sek. Kochuam sunga um chu bitna ahi.

#### **5. Kochuam chun nasepna hui-tung leh phachuam ei hiatsak:**

Kochuam hi apawl ah Pathian a dinga l kipiaknau, nasepkhawmna mun ahia, khawvel ah a khut leh keng hi dinga Pathian in a siam ahi. Zia-ziakchun nasepna dik leh to, um-zia nei chu kochuam in Lal nasepna a ngaidan apat te(measure) sek di ahi. Pathian nasepna lam ah mimal leh pawl chialepte phachuam ngaina hi ahat in asang thei ten a, maleh kochuam zia kipat in a bit em? Pathian kochuam lungthim tawh a kituak em? ti ngaitua zing a kul hi. Pathian nasepna ding a l lawting penna diu leh l phachuampi penna ding uh chu kochuam nasepna zui a chia hi ahi zingsek hi.

#### **Thukhakna:**

Zia l gentak teu apat ahin kochuam sunga um pawimaw zia l ngaitua be thei tampi um ina e! Kochuam hin Pathian thu chia-pi dan ah te, nasep dan ate leh Pathian ho biak dan chindan ah te kikaihuaeina feltak a nei chiat a, zia chu ngai pawimaw ah kochuam sunga um thalel gingtute chu thagau lam ah bep hilo in, taksa thil ah khawsakna lam ah le mi piting ahi sek ui.

# Gam chuam chuam ah Presbyterian Kochuam dinmun

## Nasepte 1:8

**Thumapui:** Tuni hin khawvel gam chuam chuam ah Presbyterian Kochuam dinmun zil ding I hiu. I zillai ding uh hi ahuap lian mama ziakin chipchil takin kihung gen senglo ding ahi ti ala hia masa hitiu. Presbyterian Kochuam umna hi gam 290 set ahi ziakin a dinmun uh gen sen hi pua'n tin, atangpi zil ding I hiu.

### 1. Presbyterian Kochuam bakzante kigawmkhawm:

June 18-23, 2010 sung khan khawvel ah Presbyterian Kochuam bakzante kigawmkhawm pawl lian pani- Reformed Ecumenical Church(REC) leh World Alliance of Reformed Churches(WARC) te chun Calvin College, Grand Rapids, Michigan, USA ah khawmpi nei in, pawl khat in akisiam tau. A kigawmkhawm nau pawlthak min chu "World Communion of Reformed Churches"(WCRC) ahi. Tu dinmun ah WCRC va zawmtute chu khawvel gam chuam chuam 108 apat in Kochuam 230 a hiu ah, Kochuam member chu maktaduai sawngiat hial a ting ui. Presbyterian Kochuam bakzam hi ngal a WCRC zawm lo bangzat ahem a um nalai ua, ziaziaik chun member zosia zat hi zia sang ah

tamzaw um ngei in nau.

### 2. Europe gam ah Presbyterian Kochuam dinmun:

Europe gam bung sunga gam chuam chuam lak a sawn Presbyterian Kochuam a umsuak thim hi. German gam bep inle kochuam mipi maktaduai sawmni leh nga val zen a um ua, Pastor ziangle singkhat sang-giat vel hial a nei ui. Hungary gam in Kochuam 1500 a um ua, Kochuam member le maktaduai nil eh singli set a nei ui. Netherland gam in Kochuam 2046 a um ua, member nuai sawmni leh thum leh sang guk zet a um ui. Romania gam ah sawn Pastor bial zaguk sawngiat leh sagi a um ua, Kochuam member le nuai sagi vel hial a um ui. Bohemia gamte, Grik gam, Portugal gam, Belgium gam, Poland gam leh Spain gam ate sawn Presbyterian Kochuam

tamtak a um ui. Europe gamsung ah kochuam bakzam member maktaduai sawmthum vel um ah hiat ahi.

### 3. United Kingdom(Great Britain) ah:

United Kingdom ah Presbyterian Kochuam dinmun tangpi chu:

**i) Scotland ah:** Scotland gam hi Presbyterian Kochuam umna masa leh a lianpen le ala hisek hi. Kum 1560 akhan John Knox in Kochuam kipuak dingdan fel tak ah a guanggal chu Scottish Parliament in a phatsakpi ui. Kum 1929 apat in “Church of England” kiti in hat tak in chiapi ahi. British thialkal gam neutak ah Presbyterian Kochuam lianpen ahiu. Tuhin Kochuam 1804 um in Pastor 984 a nei ua, Kochuam member nuai sagi leh singguk leh sangli a um a, a gam mi zakhat ah sawmkua(90%) chu Presbyterian Kochuam mi leh sa ahiu.

**ii) England ah:** England gam ah hin kochuam lianpen chu “Church of England” a tiu hi ahia, masawn takin a ding zawm zel hi. Kum 1876 apat in Presbyterian Kochuamte chu kigawmkhawm in “Presbyterian Church of England” ti’n hiat ahiu. Hun hung chiazal ah huap-lianzaw deu in

Congregational Kochuamte tawh kigawm khawm in “United Reformed Church” tin a hung ding zawm kit ua, zia chun member maktaduai thum hial a hung hui.

**iii) Wales ah:** Wales gam hi ei hingtu Kochuam ahiu. Atil ah a kochuam min uh chu “Calvinistic Methodist in Wales” ti ahi. Zia min hi Calvin in Kochuam chiadan a siamdaw pawmtute ahi ziak ua a min putsak ahiu a, a puitu masapen chu George Whitefield ahi. Kum 1900 apat in “Calvinistic Methodist” ahem “Presbyterian Church of Wales” tiin ahem in a Kochuam min a zik sek ui. Kum 1933 apat in “Presbyterian Kochuam” hung kiti bep ahiu. India malsua Welsh Mission Kochuamte hin Wales gamte sang in Presbyterian Kochuam min hi a pu masa zaw’u a, kum 1926 Sylhet ki Khawmpi liana pat in Presbyterian Kochuam min hi ala kimang/kivua ahi tai.

Wales gam ahin Kochuam dinmun ahung keniam nasa ten a, tu dinmun in Presbyterian Church of Wales hin Kochuam 700 nei in Kochuam member singthum a um hi. United Reformed Churchte hin Kochuam 1500 anei lai un Kochuam member singguk leh sang giat a um kit ui. A panu

ah kigawm in Wales gam ah hin Presbyterian Kochuam apat hung pawtdawk kochuam 2200 a um ua, Kochuam member singkua leh sang giat a um hi.

**4. USA ah:** United States of America gam ah Presbyterian Kochuam phudawktu chu Scott mi Francis Mahemia ahia, ama hi, “America Presbyterian Kochuam Pa” ti min a pia hial ui. Chun, hun hung chiazal in, kum 1983 apat khan Presbyterian Kochuam apat hung khangdawkte chu kigawmkhawm in “The Presbyterian Church of USA” ti min a hun pu’u a, tu dinmun ah a gam ua hin Presbyterian Kochuam apat hung khangdawk 39,61,165 member a um ui.

**5. South Korea ah:** South Korea gam hi Asia gam a ding ah chun Presbyterian Kochuam apat hung khangdawk tamna gam ahi. Kochuam lian thei mama, hing mama, chanchinpha genzak ngaikhawk mamate ahia. Kochuam lian diakte chu:- Presbyterian Church of Korea, Logo of the Presbyterian Church of Korea, Classification Protestant, Orientation Calvinist leh polity Presbyteriane ahia. Zia Kochuamte hin Kochuam bik 6978, Pastor semlai 10950 a um ua, Kochuam mem-

ber 23,95,323 hial a um uh ahi. **6. India ah:** India gam ahin Presbyterian Kochuam bakzam Kochuam pawl lian tak tak pathum:- Church of North India(CNI), Church of South India(CSI) leh Presbyterian Church of India(PCI) te a um ui.

Church of North India(CNI) Kochuam hin India gam zosia a huap suak hi. Pastor bial 3000 nei in Kochuam member 12,50,000 hial a nei ui.

Church of South India(CSI) hi India gam ah Church of Englandte malakna goluatu a hiu. Kum 1947 khan India simlam ah Protestant Kochuam pawl chuam chuamte tawh Anglican Kochuam kigawmkhawmte’n a siam uh ahi. Tu hin Kochuam member maktaduai 380 a nei ui.

Presbyterian Church of India(PCI) hi kum 2020-2022 kisingna khan Synods 11, Presbyteries 142, Districts 678, Local Churches 3416, Branches Churches 597, Ministers 1245, Pro Pastors 125, Elders 12986, Mission field workers 3360, Communicants 946460, Baptized non-Communicants 442608, Males 763740, Females 813090, Total membership 1576830.

## DIK LASA EM ?

By:- Rev. N. Dalla

1. Zu i khamlo man ah mipha ki hi ziang ahi pua, zia sâng ah chun thagau in dim zaw tau in ei ti hi, i hi diaklo chun a dik ki hi diaklo ahi. (Eph. 5:18)
2. Ki sôm thei lona haw hi zukham na a pat hung umsek himaleh, thagau ah i kihi dim diaklo ua ahi chun, zu'khamlo le hinle ki sôm zawlo na'n ei pha thei tho tho ahi.
3. I lungthim ah um um gêndaw pot pot ah, lungdam tak ah um kît ziang thei hi lungthim thianna a bat ten vâng ah, i thugên daw khan mi lungthim bang gual in a suna em? ti ngaitua ngai ahi.
4. A gênkhiâl khâk leh ngaidam dawn vângvei ziang thei haw hi mi lungthim tamval te ahi deu sek ua, mi gênkhiâl na ala chingsui zing ziangte haw hi mi lungthim chawl damlo te hisek ahiu.
5. Nupa'n tam tak kicheng la hi ngal, kicheng dukdak theilo, umkhawm mai mai, lungthim ki pumkhat thei mawng mawnglo a tam uh ahi.
6. Numei ching chun a pawsal thâine lona ki lat saklo hial in a bawl thei ah, numei ngawl in vâng a pawsal thâine lona suklat ham ham a gawsek uh ahi.
7. Numei ching chun a pawsal a za'bawl na mi lakin a sulang sek ah, numei ngawl te'n vâng a pawsal a ki za'bawl sak sek uh ahi.
8. Numei thugen ngai zosia hi thâinelo a hi ziang puau ah, numei thu him him lâklo hile thâine na chu hi diaklo ahi.
9. Buaina a um phât leh mi phalote â dîngin nasep ding ahung tam sek ah, migilote leh buaina kiti hi a kikhen thei pua, a ki tawnkhawm zing uh ahi.
10. Mi'n a sukbuai ziak ah buai a um ua, ama leh ama ki subuai ah buai le a um kît ua, buaina chawkdawk tu mawng mawng a pang lawi le a umsek uh ahi.
11. Buaina ki maituapi gawlote le a buai nuam ua, buaina tuaklo dîng gual ah ki kawi te le a buai kît zêl ua, hângsan tak ah buaina ki maituapi ah suk navak gawte'n buaina a zo sek uh ahi.
12. Buaina hi a umlo thei chu ahi pua, buaina tamzaw hi lungthim apat

- hung kipan hideu sek ahia, lungput diklo hin buaina ahung chawk-dawk nuam sek ahi.
13. Pianthak hi a vêl vêl ah umlo ding chi chu ahia, himaleh i pianthak tak tak nailo ziak ua, a vêl vêl ah piangthak khasek kiji zaw ahi.
14. A nêk a dawn phalo haw a haisan thei ziak ah piangthak ah ki ngaiziang lawi mi a umsek ua, nêk leh dawn, muam leh chêp haisan zaw hi pianthakna ahi lâizang pua, piangthak te'n vâng, a haisan sek ui ti' thu ahi.
15. Piangthak hinda'n ki sânglo mi a tam ma mau ah, piangthak la kahi kiti ngâl, hindân ki danglamna bangma um diaklo chu piangthak hilo in 'piangtheu' hikha zaw ding ahiv.
16. Piangthak kiti hi a umlo khat a hawl ah va ki hawl dawthaw ding lam hilo in, Khrista'n ei seppiak zawsa pawm ngam na hi ahi.
17. Kawlte leh sâpte hi phungthu sût ah kisala ti a ki he bêk pua, eilak ah phungthu sût sût ziang haw hi'n bang phatchuamna a mu'diu a um ah, hiti kisakla ahi diu em?
18. U'pa, naupa, phung u'pa a lianzaw, a neuzaw, i ki khaikhawm nau tite haw i buai pi ziang uhi'n bang a lawkna a um ah, i hiti kisakla pi uh ahi diam?
19. Ei suantupa i pu'u mîtmawna min po chu i phung min in i zuk ki nei ua, nang uh, kei uh, a mau tite haw po in, i vak kikhen no to ua, i phungthu hiat uhi, i ki tuak mawnau bulpi khat ahung hi khawlaw ta ei vei..!
20. Sâpgam ah nam changkâng ma ma te'n bawn phungthu buai pi lo ua, eigam ningkawchawng ah nam ah simkham le hilo te hin, phungthu i hiti kisakla pi uhi, khantona ah i ngailai un, i hiatlo kâl ua i la niambiak nau ala hizaw daih thei ei vei..!
21. Damthei hile gitlona a hi zianglo vâng in, migilote hi mi damthei deute ala hi nuam ma ma sek uh ahi.
22. Gên ding ah pha ma ma gênlo ah um mang ziang sâng in, gênlo ding ah pha ma ma va gêndaw khâk hin thil a supawi nasa zaw ahi.
23. A dawi taphawt nei tei guat ziang sâng in, a nei zaw kham kham dawi tak ah nei thei te hi, mi hausa hi zaw ei veu..!
24. Mi khenkhat chu a thilnei in a sukbuai a um ua, khenkhat kîr chu a buai ah buai ziang, bangma nei khawlawlo hial ti'le umthei talua ahi.



# Khristian Numeite Mawpuakna

By- Mrs.Tingnu,  
Manipur Synod Compound

**Thumapui:** Amasa'n tuni hunpha ei petu Pa Pathian kiang in kipakthu ka gen hi. Seminar paper la ding ah doisakna ei pia Tuithanak District PWF te chung in le kipak thu ka hun gen hi. Tuni hun ah I zil khawm ding uh Khristian Numeite mawpuakna te chu, mani mimal chung, Insung Kochuam leh numei te dinmun ahi.

## 1. Mani Mimal chung ah mawpuakna:

Khristian Numei/Nu te hin mani mimal chung ah mawpuakna I nei masapen ui, kei hi banggual mi ka hi em? Jesu ka nei na em, ti I ki khaul masak pen ding uh ahi. Nei leh go, nik leh puan, bank balance sana leh dangka leh thil chuam chuam Jesu bei ah nei hi a lau um ma ma ahi. Numei piangthak lo chun mawpuakna a paw jou pua, a le lam tak in hinkhua siatnan a mat khawlaw sek hi. Pathian dawigual ah mawpuakna I zaw theina ding in amasapen in pianthakna diktak nei a, Jesu nei hi I mawpuaknau masapen chu ahi. Zia ban ah chun; nisin Bible sim jing leh Pauchap jing hi I mawpuaknau ahi.

## 2. Insung ah mawpuakna:

*(i) Insung suktup leh suk thiantho:-*

Khristian numei/nu khat chun in leh lou suktup a, a fel thei lam pen ah koi ding ahi. Insung ah I van nei, nik leh puan, um leh bel thiangtho thei pen ah koi a, I in kiang leh kimvel le hawitak a suktup ah thiangtho tak ah kawhi I mawpuaknau ahi. Insung sutup lo ah kholai vakvial hi I mawpuaknau ei puai.

*(ii) Pawsal te chung ah:-*

a) I pawsal te ziak ah minu, inneinu ki chang ahin, kipak leh lungoi tak ah um ding ahi.  
b) 1Peter 3:1-6 , Colossa 3:18, Ephesa 5:22-24 na ah, nang uh zite haw la pawsal teu thu thu'n um un, khenkhat in Pathian thu ginglo maleu, thugen hilo in, la tawidan un zothei in lau ti ahi. I pawsal chu zukham sava, umdan diklo, a mawpuakna la zolo le hi-

mathei, himaleh I ki thuapi ah pauchapna nei piak zing ding ahi. I pawsal chu a hauziak, a hoi ziak, a phat ziak ah za ding leh a thu nun ding ti ei pua. Bible in la pawsal za in a ti hi I bawl ding ahi.

c) Pawsal te hiat pi lo ah a guk ah thil bawl lo ding ahi. A nei leh gote za piak ah suk chatvai ding ei puai, a sil leh chen suk thiangtho ah suktup piak ding ahi. Miten nang pawsal ahi ti a hiat theina ding un.

d) Pawsal te nasepna, a umlo nungua le sutzawp zel ding ahi. Graham Staines zinu Gladys in a pawsal thinung in India leh gam chuam chuam in, chanchinpha a gen jel hi.

**(iii) *Insung mite chung ah:-***

Khristian numei/nu chun a pawsal chau limbawl ding ei pua, a pianna nu leh pa chu eima nu leh pa gual ah ngai ding ahi. Pathian in a mau haw enkawl ding ah maw puakna ei piak ahi ziak in I ki hiatmaw sak ding ei puai. A nik leh puan teu suktup piak a thiangtho tak leh lungthim nuam tak ah koi ding ahi. A nek thei di chiu le hiat ah gilkiak ah kawi lo ding hi. Chuleh, pawsal suapite chu eima

pianpi suapi te gual ah ngai a kiho thei tak ah um guat ding ahi. Pawsal tu leh cha te a in ua ala ngam ma ma te chu nang um nung ah le ngam zawm zel ding ah koi ding ahin, ngainat ding ahi. Mou I nei teu hepi tak ah I etkawl ding uh ahi. 1 Korinth 13:1-13 na ah, thil zosia hithei in, hepi na ka nei lo chun vaikhutbet gi gual leh bangma kei puai ti I mu ahi. Hepina nei ding hi I mawpuaknau ahi. Insung mite phatna ding leh khantou na ding ngaitua zing ding ahi. Insungmite chung ah napha sep hi Pathian nasepna le ahin, I mawpuak nau le ahi. Khristian numei te hi insung sulim leh sukupak tu a pan ding ahi, thupaw vel, mi kinaksak, mi tattua ah panlo ham a phai. Khristian numei/nu chamna si- amtu ah pan hi Pathian nasep ahin, I mawpuaknau le ahi. Nu khat chu mobile phone tawh kitua zing ziang lo ding ahi.

**(iv) *Chate chung ah:-***

a) Chate hi Lalpa a apat I go chan uh, a kipak man ei piak te ahiu. Sam 127:3. Chate hi eimau a ei pua Pathian a ahiu. Khawvel ahin thil thupi nei leh go, Sana dangka

ngaikhok ding tamtak l nei ah, ahinla, Bible in Pathian in go l chin ding ua ei piak go lak lak ah go thupi pen l chateu hi Pathian dawigual ah entup a l chintup ding uh l kaihuai ding uh ahi.

b) Neu cha ahilai ua pat Kum(5-7) sung ahin, Bible sim dan. Pathian choihoi na la, Pauchap dan leh Bible ah mipha te chanchin hil ah genpiak jel ding ahi.

c) A neu lai ua pat maicham siampi a, Pathian ah pianthak-na hoitak neisak ding ahi. Naupang chu kum(4-14) sung ahin hoideu ah piangthak thei ei tau, a paingthak nau em, ti l hiat pi ding uh ahi.

d) Sunday school kai ngaikhawk dan ziltil ding leh l Presbyterian thugin ziltil ding ahi.

e) Chate thiamzilna ngaikhawk ah tawsat ding leh tup leh ngim nei sak ding ahi

f) Insung ah chate hi a neulai ua pat insung suktup dan, nek leh chak bawl dan, nik leh puan suktup dan, thiangtho tak ah um ding dan, a sang ua lianzaw te za dan, lawi leh pai pawl di dan, kholai vak ding dan, zin leh leng lamtua ding dan, zuau gen phat lo

dan, mi gensiat lo ding dan, mi musit lo ding dan ziltil ding ahi. Chate a hun tak ah ziltil na chun 75% hi aki lawting sek hi ti ahi. Thupilte 22:6 na naupangte chu lamdik hil le chun a hung upat tiang un le petmang ta puan nau ti mu ahi.

g) Chate thunun na ding in mawl it chak lo ding ahi. Thupilte 23:13-14, mawl in vaw le chun Sheol ah kipat huk dawk zaw ding la hingal in. Mawl hi hun sin ah mat ding tina hilo in, thu a awilo tak leh, a ten ten tak leh ti na ahi.

h) Timothy hi api Loisi leh anu Eunice in a neu lai a pat Pathian thu a la tulut uh ahi, ziagual a hin chate a neu lai ua pat Pathian thu ziltil leh tulut hi l mawpuaknau ahi.

i) Chate ahung pitin nung un, Zi leh pawsal nei thei ding a ahung um hun un, ei mau doi dandan ah hawlpiak lou ding ahi. Pathian dawng kawm ah pauchap kawm ah 'mi piangthak' l neisak guat ding uh ahi.

### 3. Kochuam ah mawpuakna:

Numei/Nu te hin kochuam ah mawpuakna l nei teu, ngaikh-

hawk ding ahi. PWF member. Committee, Kochuam thapiakna, pauchap khawmna, Budget tuak ding dawl, missionary tholawm, phunchiak lo a pan a, tuak jel ding ahi. Anchangham I kawi teu le a thiang nek ziang thei, a thi-ang te haw kha I koi ding uh ahi. Biakin kikhop ngaikhok ding ahi. Numei kikhawp nitak ngaikhawk ah kikhawp ngei ngei ding ahi. Chuleh, khosung, bial, center lam programme kiguat te ngaikhawk ngei ngei ding ahi.

Kochuam thugin bu leh numei kikaihui na bu hi sim a, hiatguat ding ahi. Kochuam sung ah meithai leh nauchagate kan-thak zing ding ahi. Jacob 1:27 na ah Pa mitmu ah sakhaw thiango leh sukbuak lo chu nauchaga leh meithaite a genthei lai ua kan-thak leh vethak hi ahi, ti mu ahi.

#### **4. Numei dinmun:**

Lalpa'n numei te hi lam-dang tak sekdou tak, thuk hat tak leh melhoi tak ah ei la si-ante I hui a, I man tam ma mau hi. Numei te hi ngaitua khawm ding haute, ngaikhawk ding hau, malam ah thil tung nailo te ngai-tua masa lunggim ma ma te, nui nawp lo sasan sunggil lam kap kawm ah a pawlam ah nui ham ham sek te, mi kiphai, mi dang

a ding ah tawmngai sua nuam, kuama hiatpi lo ah mi ngaikhawk te, kuaman mawpuakna ei pelo leule, ka mawpuakna ahi ti thei te, napha sem nuam zing te, I hi ziak un Pathian hi le I chung un kipak ding in ka gingcha, Pathian kiang in kipakthu gen jel hitiu.

Khristian numeite nungak hileh nupi hileh thil lopi tak tak bawl dawk theite I hui. Zia ziak chun napha sep utna lungthim put zing apoimaw hi. Thupilte 14:1 na ah Numei pil chun a ma insung ding a kisiam in, a ngol te chun vang amau khut ngei in a phel jak sek ui ti mu ahi. Khristian numei zosia khut leh lungthim ah hin tundin na ding leh phelsua na, khenzak theina um ahi. Lalpa'n mawpuakna li-antak I khut ua a kawi, I liang-ko ua a ngak hi, I mawpuaknau ahi ziak in, a phalam ah supiting a, mawpuakna ngaikhawk chiat ding hi I mawpuaknau ahi.

--o0o--

## Presbytery sung thu chuam chuam – Dec. 2022

1. Dt. 28<sup>th</sup> October 2022 ni'n L. Champhai Biakin kisathak chu Rev. Lienthienmang in hawwna nei in, Rev. Thanglianmang Moderator in Pathian thugenna nei in, zia ni hin Presbytery O.B ten ava uap thei ui.
2. Dt. 6<sup>th</sup> Nov. 2022 ni'n Nghathal P.C (Tuithaphai Presbytery) ah Manipur Synod Bible School Graduation Day mat ahin, chuleh Dt. 13<sup>th</sup> Nov. 2022 ni'n Leilon P.C ah "Manipur Synod Mobile Bible School Graduation Day" mat kit a hi.
3. Dt. 6<sup>th</sup> Nov. 2022(Pathianni) MPYF Inter Pastorate visit Sadar District ah Leilon Vaiphei Biakin ah amang ui.
4. Dt. 7<sup>th</sup> Nov. 2022 ni'n O.B te malatna'n Rev. Thanglianmang Moderator in Biak In sakna dinga Suangphumna nei ahi'n, zia hun matna ahin Sadar District Puitute leh Kangpokpi Town Puitute leh Kochuam puitute apang thei ui.
5. "Youth & Witness" ti thupi ah manga Fiengpui P.C, (Biateram Synod) Halflong ah PCI (PYF) Youth Camp-2022, Dt. 11<sup>th</sup> - 13<sup>th</sup> Nov. 2022 sunga mat ahi'n, ei CKKP apat in Mr. S. Lianbawi Asst. Leader CKKP, Mr. L. Sanglian Secretary CKKP leh Mr. Liangouson member MPYF te ava pang thei ui.
6. Dt. 22<sup>nd</sup> Nov. 2022 Leilon Vaiphei P.C ten The Good Shepherd Home vena anei un, pauchapna thamuan um tak leh thilpiak piakna le anei ui.
7. PWF(KSP) vaisaina nuai in "REVIVAL PROGRAMME" Dt. 25<sup>th</sup> - 27<sup>th</sup> Nov. 2022 sungin Gangpimuol P.C ah thupi "Thilpha bawl leh kipanpitua"-Heb. 13:16 ah mang in Speaker in Evan. Kamthang pang in, lim leh kipak takah mat zaw ahi.

